

四庫全書

子部

欽定四庫全書

冊府元龜卷九百八十四

宋 王欽若等 撰

外臣部

征討第三

蜀後主建興三年三月丞相諸葛亮率衆南征雋夷
王高定遂至滇池南中平皆即其渠率而用之

八年丞相叅軍領益州治中從事馬忠督將軍張嶷等
討汶山郡叛羌嶷別督數營在先至侏里邑所在高峻

巖隨山立上四五里羌於要厄作石門於門上施牀積石于其上過者下石槌擊之無不糜爛巖度不可得攻乃使譯告曉之曰汝汶山諸種反叛傷害良善天子命將討滅惡類汝等若稽顙過軍資給糧費福祿永隆其報百倍若終不從大兵致誅雷擊電下雖追悔之亦無益也者帥得命即出詣巖給糧過軍軍前討餘種聞佗里已下悉恐佈失所或迎軍出降或奔竄山谷放兵攻擊軍以克捷

十一年南夷豪帥劉胄反擾亂諸郡以馬忠為康降都督討之忠遂斬胄平南土

延熙三年春使越雋太守張嶷平定越雋郡初越雋自丞相諸葛亮討高定之後叟夷數反殺太守龔祿焦璜是後太守不敢之郡只住安定縣去郡八百里其郡徒有名而已時論欲復舊郡除嶷為越雋太守嶷將所領往之郡誘以恩信蠻夷皆服頗來降附北徼捉馬最驍勁不承節度疑乃往討生縛其帥魏狼又解縱告喻使

招懷餘類諸種聞之多漸降服斯都耆帥李求承昔手
殺龔祿疑求募捕得數其宿惡而誅之

十年汶山平康夷反衛將軍姜維往討破平之

吳大帝黃龍三年二月遣太常潘濬率衆五萬討武陵
蠻夷

嘉禾三年潘濬平武陵蠻又云潘濬太常五溪蠻夷叛
亂假節督諸軍討之自是羣

蠻衰弱一
方寧靜

赤烏二年十月將軍薛秘南討夷賊

之及振武將軍宗慤伐之和之遣司馬蕭景獻為前鋒
向區粟城其王陽邁遣大帥范扶龍戍區粟城景獻攻
城克之斬扶龍獲金銀雜物不可勝計追討即克林邑
陽邁父子並挺身奔逃凡所獲珍異皆是未名之寶
孝武帝大明四年十月遣司空沈慶之討松江蠻

南齊太祖建元元年南襄城蠻秦遠寇潼陽比上黃蠻
文勉德寇汶陽荊州刺史豫章王遣中兵叅軍劉伍緒
領千人討勉德至當陽降之

武帝永明十年武都王楊集始反率氐蜀雜種寇漢川涼州刺史陰智伯遣軍主寧朔將軍桓盧奴梁季郡宋王士隆等千餘人拒之不利退保白馬賊衆萬餘人縱兵火攻其城柵盧奴拒守死戰智伯又遣軍主陰仲昌等馬步數千人救援至白馬城東千谿橋相去數里集始等悉力攻之官軍內外奮擊集始大敗十八營一時潰走殺獲數千人集始奔入虜界

後魏道武天興元年七月漁陽烏丸庫偃官韜聚黨為

寇詔冠軍將軍王建討平之

二年三月丙子遣建義將軍庾真越騎校尉奚斤討庫狄部帥葉赤宥連部帥竇羽泥於大渾川破之庫狄勒支子沓亦于率其部落內附真等進破侯莫陳部獲馬牛羊十餘萬頭追殄遺迹并入大峨谷

四年十二月辛亥詔征西大將軍常山王遵等率衆五萬討破多蘭部木易千材官將軍和突率騎六千襲黠佛素古延等諸部

六年十月丁巳詔將軍伊謂率騎二萬北襲高車十一月大破之

明元永興二年正月詔南平公長孫嵩等北伐蠕蠕

為元

年冬犯塞五月間帝親征乃遁走

五年四月車駕西巡詔左丞相奚斤為先驅討越勤部

勤一作勒於鹿那山大破之獲馬五萬匹牛羊二十萬頭徙

二萬餘家而還

泰常元年十月徙河部落庫偃官斌元降後復叛歸北

燕馮跋驍騎將軍延普渡濡水討擊斬斌大破之及獲馮跋幽州刺史漁陽公庫偃官昌征北將軍關內侯庫偃官提等首生擒庫偃官女生縛送京師幽州平

三年正月詔護高車中郎將薛繁率高車丁零十二部大人衆北畧至弱水降者二千餘人獲馬牛羊二萬餘頭

太武始光元年八月蠕蠕率六萬騎入雲中殺掠吏民攻陷盛樂宮赭陽子尉普文率輕騎討之虜乃退走詔

安集將軍平陽王長孫輸率北部諸將尉眷自叅合以
北擊大檀別帥阿伏干於祁山斬首數千級獲馬萬餘
匹十二月遣平陽王長孫輸等討蠕蠕車駕次祁山蠕
蠕北遁諸軍追之大獲而還

神麈元年閏十月定州丁零鮮于臺陽翟喬等二千餘
家叛入西山劫掠郡縣州兵討之失利詔鎮南將軍壽
光侯叔孫建擊之

二年八月帝以東部高車屯已厄陂詔左僕射安原率

騎萬餘討之

三年四月勅勒萬餘落叛走詔尚書封鐵追討滅之

延和三年三月金當川率其衆圍西川侯彭文暉於陰
密詔征西大將軍常山王素討獲當川斬之於長安以狗
七月命諸軍討山胡白龍于西河九月戊子尅之斬白
龍及其將帥屠其城

大延二年五月仇池氏楊難當竊據上邽七月庚戌詔
驃騎大將軍樂平王丕等督河西高平諸軍討之

九月以難

當攝上

邦守

三年七月使撫軍大將軍永昌王健司空上黨王長孫道生討山胡白龍餘黨於西河滅之

太平真君六年八月征西大將軍高涼王那等討吐谷渾慕利延軍到曼頭城慕利延驅其部落西渡流沙那急追故西秦王慕世子被囊破之中山公杜豐追度三危至雪山擒被囊及慕利延元子什歸熾盤子成龍送於京師慕利延遂西入于闐國

九年九月成周公萬度千里驛上大破焉耆國其王鳩尸卑那奔龜茲

十二月詔成周公萬度歸自焉耆西討龜茲

文成大安二年二月丁零數千家亡匿井陘山聚為寇盜詔定州刺史許宗之并州刺史乞佛成龍討平之

八月平西將軍漁陽公尉眷北擊伊吾尅其城大獲而還

和平元年二月衛將軍樂安王良督東雍吐京六壁諸

軍西趣河征西將軍皮豹子等督河西諸軍南趣石樓以討河西叛胡

六月甲午詔征西大將軍陽平王新城等督統萬高平諸軍出南道南郡公李惠等督源州諸軍出北道討吐谷渾什寅

八月西征諸軍至西平什寅走保南山九月諸軍濟河追之遇瘴氣多有疾病乃引軍還獲畜二十餘萬

三年六月諸將軍陸真討雍州叛氏仇儻檀大破之

五年七月北鎮游軍大破蠕蠕

獻文皇興四年二月吐谷渾什寅不供職貢詔使持節
征西大將軍上黨王長孫觀討之軍至曼頭山大破什
寅什寅與麾下數百騎遁什寅從弟豆勿來及其渠
帥匹婁拔累等率所領降附

孝文延興元年十月沃野統萬二鎮勅叛詔太尉隴
西王元賀追擊至枹罕滅之斬首三萬餘級徙其遺迸
於冀定相三州為營戶

二年正月統萬鎮胡民相率北叛詔寧南將軍交趾公韓拔追滅之

三年四月詔假司空上黨王長孫觀等征吐谷渾什寅十月武都王反攻仇池詔長孫觀回師討之

太和元年十二月蠕蠕犯塞詔任城王澄率衆討之

十四年四月地豆干頻犯塞征西大將軍陽平王贍擊走之

十六年八月詔陽平王贍左僕射陸叡督十二將七萬

騎北討蠕蠕

二十年閏十一月右將軍元隆大破汾州叛胡

二十二年八月勅勒樹者相率反叛詔平北將軍江陽王繼都督北討諸軍事以討之

宣武景明三年三月魯陽蠻叛詔撫軍將軍李崇討之
四年十二月詔鎮南李崇討東荆反蠻明年崇大破諸蠻帥樊安

正始二年十一月武興國王楊紹先叔父集起謀反詔

光祿大夫楊椿討之十二月又詔驃騎大將軍源懷慎
令討武興反氏

三年正月梁秦二州刺史邢巒連破氏賊尅武興

是日楊集

起兄弟
相率降

永平三年二月秦州隴西羌殺鎮將趙雋阻兵反叛州
軍討平之

孝明以延昌四年正月即位四月梁州刺史薛懷古破
反氏於沮水

五月南秦州刺史崔暹擊破氐賊解武興圍

正光四年二月蠕蠕主阿那環率衆犯塞遣尚書右丞相元孚持節喻之阿那環執孚驅掠畜牧北遁詔驃騎大將軍尚書令李崇中軍將軍兼尚書右僕射元纂率騎十萬討蠕蠕出塞三千餘里不及而還

五年十二月汾州正平陽山胡叛逆詔復征東將軍章武王融封爵為大都督率衆討之

孝昌元年十二月以臨淮王彧為征南大將軍率衆討

魯陽蠻

三年三月西部勅勒斛律雒陽反於桑乾西牧子通連
別將爾朱榮擊破之

五月以安西將軍光祿大夫宗正珍孫為都督討汾州
反胡

出帝永熙三年正月天柱大將軍高歡討費也頭於河
西苦洩河大破之獲其帥紇豆陵伊利遷其部落於內
地

二月東梁州為民夷侵逼詔使持節車騎大將軍行東
雍州事泉企為東梁州行臺都督以討之

西魏文帝大統七年三月襲胡帥夏州刺史劉平伏據
上郡叛遣開府于謹討平之

恭帝元年四月茹茹乙旃達官寇廣武遣柱國趙貴追
擊之斬首數千級收其輜重而還十一月柱國于謹既
平江陵諸蠻騷動詔豆盧寧蔡祐等討破之

東魏孝靜太平二年正月齊神武為大丞相柱國大將

軍襲擊中山胡劉蠡升大破之三月神武欲以女妻蠡
升太子候其不設備乃潛師襲之其北部王斬蠡升首
以送其衆復立其子南海王神武擊之又獲南海王及
其弟西海王北海王皇后公卿以下四百餘人胡魏五
萬戶

十一月齊神武討山胡叛平之俘獲一萬餘戶口分配
諸州

北齊文宣天保三年正月帝親討庫莫奚於代郡大破

之獲雜畜十餘萬分賚將士各有差以奚口付山東為
民

四年九月契丹犯塞帝北巡冀定幽安仍北討十月丁酉帝至平州遂從西道趣長塹詔司徒潘相樂帥精騎五千自東道趣青山辛丑至白狼城壬寅終昌黎城復詔安德王韓軌率精騎四千東趣斷契丹走路癸卯至陽師水倍道兼行掩襲契丹甲辰帝親踰山嶺為士卒先指麾奮擊大破之虜獲十餘萬口雜畜數十萬頭樂

又于青山大破契丹別部所虜生口皆分置諸州十二
月突厥攻茹茹茹舉國南奔帝自晉北討突厥迎納
茹茹乃廢其主庫提立阿那環子菴羅辰為主置之馬
邑川給其廩餼繒帛親退突厥於朔州突厥請降許之
而還於是貢獻相繼

五年正月帝討山胡從離石道遣太師咸陽王斛律金
從顯州道常山王從晉州道犄角夾攻大破之斬首數
萬獲雜畜十餘萬遂平石樓石樓絕險自魏世所不能

至於是遠近山胡莫不懾服

三月茹茹菴羅辰叛帝親討大破之辰父子北遁

四月茹茹寇肆州帝自晉陽討之至恒州黃瓜堆虜騎走時大軍已還帝率麾下千餘騎遇茹茹別部數萬四面圍逼帝神色自若指畫形勢虜衆披靡遂縱兵潰圍而出虜乃退走追擊之伏尸二十里獲菴羅辰妻子及生口三萬餘人

五月北討茹茹大破之

六月茹茹率部衆東徙將南侵帝率輕騎於金山下邀擊之茹茹聞而遠遁

六年六月帝親討茹茹諸軍大會於祁連池七月己卯帝頓白道留輜重親率輕騎五千追茹茹壬午及於懷朔鎮帝躬當矢石頻大破之遂至沃野獲其俟利藹然力婁阿嘗吐頭發郁久間拔延等并口二萬餘牛羊數十萬頭茹茹俟利郁久間李提率部人數百降

孝昭皇建元年十一月親戎北討庫莫奚長城處奔遁

分兵致討大獲牛馬括總入晉陽宮

武成河清三年四月衛將軍斛律光率騎北討突厥獲馬千餘匹

後周武帝天和元年九月信州蠻冉令賢向五子王反詔開府陸騰討平之先是巴西人譙淹扇動羣蠻以附於梁蠻帥向鎮侯向白彪等應之尋而冉令賢向五子王又攻陷白帝殺開府楊長華遂相率作亂前後遣開府元契趙剛等總兵出討雖破翦其族類而元惡未除

至是詔騰督王亮司馬裔等討之騰水陸俱進次于湯口先遣諭之而令賢方增浚城池嚴設捍禦遣其長子西黎諭于南王領其支屬於江南險要之地置立十城遠結涪陽蠻為其聲援令賢率其精卒固守水邏城騰乃總集將帥謀其進趣咸謂先取水邏然後經畧江南騰言於衆曰令賢內恃水邏金湯之險外託涪陽輔車之援兼復資糧充實器械精新以我懸軍攻其嚴壘脫一戰不克更成其氣不如頓軍湯口先取江南翦其羽

毛然後旋軍水邏此制勝之計也衆皆然之乃遣開府
王亮率衆渡江旬日攻拔其八城凶黨奔散獲賊帥冉
承公并生口三千人降其部衆一千戶遂簡募驍勇數
道入攻水邏路經石壁城此城峻險四面壁立故以名
焉惟有一小路緣梯而上蠻蠻以為峭絕非兵衆所行
騰被甲先升衆軍繼進備經危阻累日乃得舊路且騰
先任隆州總管雅知蠻帥冉伯黎冉安西與令賢有隙
騰乃招誘伯黎等結為父子又多遺其金帛伯黎等悅

遂為鄉導水邏側又有石勝城者亦是險要令賢使其
兄子龍真據之騰又密誘龍真云若平水邏使其代令
賢處龍真大悅密遣其子詣騰騰乃厚加禮接賜以金
帛蠻貪利既深仍請立効乃謂騰曰欲翻所據城恐人
力寡少騰許以三百兵助之既而遣二十人銜枚夜進
龍真力不能禦遂平石勝城晨至水邏蠻衆大潰斬首
萬餘級虜獲一萬口令賢遁走追而獲之并其子弟等
皆斬之司馬裔又別下其二十餘城獲其蠻帥冉三公

等騰乃積其骸骨於水邏城側為京觀後蠻蜚望見輒大號哭自此狼戾之心輟矣

六年四月信州蠻渠冉祖喜冉龍驤舉兵反詔大將軍趙闇率師討平之

建德五年二月詔皇太子巡西土因討吐谷渾

六年十一月稽胡反遣齊王憲率軍討平之初五年帝敗齊師於晉州乘勝逐北齊人所棄甲仗未暇收斂稽胡乘間竊出盜而有之乃立劉蠡升孫沒鐸為主號聖

武皇帝年曰石平時帝定東夏討之議欲窮其巢穴齊王以為種類既多又山谷阻絕王師一舉未可盡除且當翦其魁首餘加慰撫帝然之乃以憲為行軍元帥督行軍總管趙王招譙王儉滕王迥等討之憲軍次馬邑乃分道俱進沒鐸遣其黨天柱守河東大帥穆支據河西規欲分守險要犄角憲軍憲命譙王儉攻天柱滕王迥擊穆支並破之斬首萬餘級趙王招又擒沒鐸餘衆盡降

宣帝宣政元年九月汾州稽胡帥劉受邏干舉兵反詔
上柱國越王咸為行軍元帥率眾討之

隋高祖開皇元年八月甲午遣行軍元帥樂安公元諧
擊吐谷渾于青海破而降之

二年四月大將軍韓僧壽破突厥于雞頭山上柱國李
克破突厥於河北山

六月李克破突厥於馬邑

十一月突厥沙鉢悉眾為寇縱兵自木碛石門兩道來

寇武威天水安定金城上郡弘化延安六畜咸盡帝赫怒下詔曰往者魏道衰弊禍難相尋周齊抗衡分割諸夏突厥之虜俱通二國周人東慮恐齊好之深齊氏西虞懼周交之厚謂虜意輕重國遂安危非徒並有大敵之憂思減一邊之防竭生民之力供其來往傾府庫之財棄於沙漠華夏之地實為勞擾猶復劫剝烽戍殺害吏民無歲月而不有也惡積禍盈非止今日朕受天明命子育萬方愍臣下之勞除既往之弊以為厚歛兆庶

多惠豺狼未嘗感恩資而為賊違天地之意非帝王之
道節之以禮不為虛費省徭薄賦國用有餘因入賊之
物加賜將士息道路之民務於耕織清邊制勝成策在
心凶醜愚暗未知深旨將大定之日比戰國之時乘昔
世之驕結今時之憾近者盡其巢穴俱犯北邊朕分置
軍旅所在邀截望其深入一舉滅之而遠鎮偏師逢而
摧剪未及南上遽已奔北應弦染鏑過半不歸且彼渠
帥其數幾何昆季爭長父叔相猜外示彌縫內乖心腹

世行暴虐家法殘忍東夷諸國盡挾私讎西戎羣長皆
有宿怨突厥之北契丹之徒切齒磨牙嘗伺其便達頭
前攻酒泉其後于闐波斯挹怛三國一時即叛沙鉢畧
近趣周檠其部內薄孤束紇羅尋亦翻動往年利稽察
大為高麗靺鞨所破婆毗設又為紇支可汗所殺與其
為隣皆願誅勦部落之下盡異純民千種萬類仇敵怨
偶泣血拊心銜悲積憾圓首方足皆人類也有一於此
更切朕懷彼地咎徵妖作年將一紀乃獸為人語人作

神言云其國亡訖而不見每冬雷震觸地火生種類資
給惟藉水草去歲四時竟無雨雪川枯蝗暴草木燒盡
饑疫死亡人畜相半舊居之所赤地無依遷徙漠南偷
存晷刻斯蓋上天所忿驅就齊斧幽明合契今也其時
故選將治兵贏糧聚甲義士奮發壯夫肆憤願取名王
之首思捷單于之背雲歸霧集不可數也東極滄海西
盡流沙縱百勝之兵橫萬里之種亘朔野而追躡望天
涯而一掃此則王恢所說其猶射癰何敵能當何遠不

服但皇王舊迹北止幽都荒遐之表文軌所棄得其地
不可而居得其民不忍皆殺無勞兵革遠規溟海諸將
令行義兼含有降者納有違者死異域殊方被其摧
抑放聽復舊廣關邊境嚴治關塞使其不敢南望永服
威刑卧鼓息烽暫勞終逸制禦夷狄義在斯乎何用侍
子之朝無勞涓橋之拜普告海內知朕意焉於是以河
間王弘上柱國豆盧勣竇榮定左僕射高頴右僕射虞
慶則并為元帥出塞擊之沙鉢畧率阿波貪汗二可汗

等來拒戰皆敗走遁去時虜饑甚不能得食于是粉骨
為糧又多災疫死者極衆

三年四月衛王爽破突厥於白道

五月癸卯行軍總管李晃破突厥于摩那渡口壬戌行
軍元帥竇榮定破突厥及吐谷渾于涼州

六月行軍總管梁遠破吐谷渾於爾汗出山斬其名王
八月遣尚書左僕射高頴出寧州道內史監虞慶則出
原州道並為行軍元帥以擊胡

十七年二月太平公史萬歲擊西寧羌平之

十八年二月以漢王諒為行軍元帥率水陸三十萬伐高句麗九月遇疫而還

是年突厥雍虞閭數為邊患詔蜀王秀出靈州道以擊之

十九年四月達頭可汗犯塞遣八軍總管史萬歲擊破之是年遣漢王諒為元帥左僕射高頴率將軍王荅上柱國趙仲卿並出朔州道右僕射楊素率柱國李徹韓

僧壽出靈州上柱國燕榮出幽州以擊突厥是時啓民
可汗歸朝帝於朔州築大利城以居之雍虞閭又擊之
帝復令入塞雍虞閭侵掠不已遂遷於河南在夏勝二
州之間發役掘塹數百里東西拒河盡為啓民畜牧之
地於是遣越國公楊素出靈州行軍總管韓僧壽出慶
州太平公史萬歲出燕州大將軍姚辨出河州以擊都
藍師未出塞而都藍為其麾下所殺達頭自立為步迦
可汗其國大破遣太平公史萬歲出朔州以擊之遇達

頭於大斤山虜不戰而遁追斬首虜二千餘人

二十年四月突厥犯塞以晉王

煬帝也

為行軍元帥擊破

之

仁壽元年正月突厥寇恒安遣柱國韓洪擊破之洪復為虜所敗於恒安廢為庶人詔楊素為雲州道行軍元帥率啓民可汗北征斛薛薛等諸姓初附於啓民至是而叛素軍河北值突厥阿勿思力俟斤等南度掠啓民男女六千口雜畜二十餘萬而去素率上大將軍梁默

輕騎追之轉戰六十餘里大破俟斤悉得人畜以歸啓
民素又遣柱國張定和領軍大將軍劉昇別路邀擊并
多斬獲而還兵既定渡河賊復掠啓民部落素率驃騎
范貴於窟結谷東南奮擊復破之追奔八十餘里

煬帝大業元年四月大將軍劉方擊林邑破之初高祖
時天下無事羣臣言林邑多奇寶者仁壽未遣方為驩
州道行軍總管率欽州刺史甯長真驩州刺史李暈開
府秦雄步騎萬餘及犯罪者數千人擊之其王梵志率

其徒乘巨象而戰方軍不利於是多掘小坑草覆其上因以兵挑之梵志悉衆而陣方與戰偽北梵志逐之至坑所其衆多陷轉相驚駭軍遂亂方縱兵擊之大破之頻戰輒敗遂棄城而走方入其都獲其廟主十八枚皆鑄金為之蓋其有國十八葉矣方班師梵志復其故地遣使謝罪於是朝貢不絕

四年七月左翼衛大將軍宇文述破吐谷渾於曼頭赤水

五年五月吐谷渾主保覆袁州詔左屯衛大將軍張定和往捕之定和挺身挑戰為賊所殺亞將柳武建擊破之斬首數百級

六年二月武賁郎將陳稜朝散大夫張鎮州擊琉球破之獻俘萬七千口頒賜百官

七年二月詔以高麗高元獻失藩禮將欲問罪遼左

事具

帝王
親征

冊府元龜卷九百八十四

欽定四庫全書

冊府元龜卷九百八十五

宋王欽若等撰

外臣部

征討第四

唐高祖武德三年九月遣長平王叔良討叛胡平之
四年九月突厥寇并州遣左屯衛大將軍竇琮左武侯
大將軍桑顯和率師以禦之是月又寇梁州遣行軍總
管尉遲敬德太子內率上官懷仁擊之是月靈州總管

楊師道擊突厥大破之斬首三百餘級獲馬一千餘匹十一月靈州總管劉旻擊叛胡劉企成大破之斬首二百級企成僅以身免其部落皆降

五年八月突厥寇邊九月交州刺史權中通弘州總管宇文歆靈州總管楊師道擊突厥於三觀山破之獲駝馬數千匹是月宇文歆復擊突厥於崇崗鎮大破之斬首千餘級定州司馬溫彥博驃騎魏道仁擊突厥於恒山之陽斬首數百級領軍將軍安興貴擊突厥於甘州

大破之

是年并州大總管襄邑王神符擊突厥於汾東斬首五百級虜其馬二千匹汾州刺史蕭顛斬突厥五千餘級七年正月始州反獠舉兵遣行臺僕射竇軌討之

四月通事舍人李鳳起擊萬州反獠並平之

五月吐谷渾寇松州遣益州行臺左僕射竇軌自翼州道扶州刺史蔣善合自芳州道擊之是月竇軌擊反獠于方山俘二萬餘口

六月隴州扶州獠作亂遣南尹州都督李光度擊平之
七月突厥寇原州遣寧州刺史鹿大師援之又遣靈州
都督楊師道趨大木根山邀其歸路是月又寇隴州遣
護軍尉遲敬德擊之

八年七月叛胡睦伽陀攻武興八月左武侯將軍安修
仁擊於且渠川破之

九年二月突厥寇原州遣折威將軍楊毛擊之

三月益州行臺尚書郭行方擊眉州叛獠之衆大破之

進擊於洪雅二州俘男女五千口

太宗以武德九年八月即位是月突厥頡利寇高陵行軍總管尉遲敬德與戰于涇陽大破之獲其俟斤阿史德烏沒毀斬首千餘級

是月請和許之

貞觀二年正月吐谷渾寇岷州都督李道彥擊走之執其名王二人俘斬七百餘級

三年十一月以行并州都督李勣為通漢道行軍總管兵部尚書李靖為定襄道行軍總管華州刺史柴紹為

金河道行軍總管靈州大都督任城王道宗為大同道
行軍總管檢校幽州都督衛孝節為恒安道行軍總管
兼管州都督薛萬徹為暢武道行軍總管分道出師以
擊突厥是月任城王道宗擊突厥于靈州破之俘男女

數百口雜畜萬餘計

十二月突利可汗及郁射設
陸奈特勤等並帥所部來奔

四年正月李靖屯惡陽嶺夜襲定襄頡利驚擾因徙牙
於磧口胡酋康蘇密等遂以隋蕭后及楊正道來降
二月李靖次陰山擊頡利大破之滅其國復定襄恒安

之地斥土界於大漠頡利計窘竄于鐵山兵尚數萬使
執失思力入朝謝罪請舉國內附帝遣鴻臚卿唐儉將
軍安修仁持節安撫之頡利稍自安靖乘間襲擊大破
之遂滅其國頡利乘千里馬獨騎奔於從姪沙鉢羅部
落

三月大同道行軍副總管張寶相率衆奄至沙鉢羅營
生擒頡利送於京師是月突厥思結部俟斤率衆四萬
來降

四月李靖獻頡利可汗帝御順天樓盛陳文物士庶縱
觀歸之有司帝數之曰汝父啓民之破也匹馬歸隋竟
不能効一鋏之力汝次兄坐享富貴恣情暴虐酒色是
耽至今父祖不獲血食爾罪一也與我隣國侵我邊疆
失信忘義惟利是親爾罪二也恃兵馬之盛數興戎旅
部落怨嗟僵尸徧路爾罪三也侵掠我子女殘暴我禾
稼焚燒我村塢賊亂我華民爾罪四也我忘爾宿惡憫
爾同盟許爾和親復爾宗國遷延不來至于逃罪爾罪

五也爾有死罪五馬今不殺爾者徒以清水結盟以來更不南寇爾頡利歡呼而退

七年八月以右屯衛大將軍張士貴為龔州道行軍總管以擊獠

八年正月張士貴討東西王洞反獠平之

十月左驍衛大將軍段志玄擊吐谷渾破之追奔八百餘里

十一月吐谷渾拘行人趙德楷詔曰朕嗣纂洪業思恢

至道端拱垂衣於茲九載式修文德寧謐區宇徼外君
長海表酋渠無遠不庭無思不服而吐谷渾葺爾小蕃
負固河右地不遠千里衆不盈一萬不量其力不恤其
人肆情拒命抗衡上國朕每遣行人入蕃曉諭并引其
使者臨軒戒勗示以善道勸以和親欲使境上無虞各
安其業訓道積年凶頑未改剽掠邊鄙畧無寧息今上
書傲狠拘我使人內外百僚華夷兆庶同心憤怨咸願
誅討宜乘帛伐之機以展鷹鷂之志長驅尅期窮其巢

穴罪止吐谷渾可汗昏耄之主及天柱王一二邪臣自餘部落皆無所問夷凶息暴稱朕意焉

十一月以特進李靖為西海道行軍大總管節度諸軍兵部尚書侯君集為積石道行軍總管刑部尚書任城王道宗為鄯善道行軍總管仍並為靖副涼州都督李大亮為且沫道行軍總管岷州都督膠東郡公李道彥為赤水道行軍總管利州刺史高甑生為鹽澤道行軍總管

九年正月黨項羌先內屬者皆叛歸吐谷渾三月高甑
生擊破之

閏四月任城王道宗擊吐谷渾於庫山破之俘四百餘
人李靖部將薛孤吳兒以輕銳破之于曼頭山斬其名
王俘五百餘人大獲六畜以充軍糧李靖侯君集任城
王道宗等又破於牛心堆又破於赤水源獲雜畜數萬
計五月乙未侯君集任城王道宗追吐谷渾主及於烏
海擊大破之薛萬均又破天柱王於赤海獲其雜畜三

十萬計追至河源李大亮俘其名王二十人雜畜五萬計是月李靖平吐谷渾國于西海之上初王師以三月次于鄯州靖與諸將會議侯君集曰大軍已至賊徒尚未走險宜簡精銳長駟疾進掩其不虞可有大利此破竹之勢也若此策不行潛遁必遠山障為阻窮討則難靖從之乃簡縛士馬輕賫深入及庫山之捷可汗謀將入磧以避官軍道宗復曰柏海近河源古來罕有至者賊既西走未知的處今段之行實資馬力今馬疲糧少

遠入為難未若且向鄆州待馬肥之後更圖進趣君集
曰不然段志玄曩者纔至鄆州賊衆便到城下良由彼
國尚完完徒用命今者一敗以後斥候亦絕君臣相失
父子攜離乘其迫懼取同俯拾柏海雖遙便可鼓行而
至也靖又然之於是衆分士馬以為兩道靖與薛萬均
李大亮等趣北路出曼頭山逾赤水涉青海歷河源且
未窮其西境君集與道宗趣南路經途二十餘里行空
虛之地盛夏降霜多積雪山中有瘴氣歷破邏真谷其

地無水將士食冰馬皆飲雪又行月餘日至星宿川達于柏海兩軍所至皆大尅將軍執失思力又馳數百里別破虜于車茹川旋與靖會于大非川可汗長子大寧王順窮處計無所出乃斬其國相天柱王舉國來降可汗大懼與千餘騎遁于磧中衆消亡散能屬之者纔百騎十餘日竟為其左右所殺

七月鹽澤道行軍副總管劉德敏擊叛羌破之

十二年八月吐蕃寇松州都督韓威戰敗閬州刺史別

叢卧施諾州刺史杞利步利皆羌首也並以州叛附于吐蕃以吏部尚書侯君集為當彌道行軍大總管右領軍大將軍執失思力為白蘭道行軍總管左武衛將軍牛進達為活水道行軍總管右領軍將軍劉簡為桃源道行軍總管督步騎五萬以擊之

九月行軍總管牛進達及吐蕃戰于松州前後斬首千餘級

十月均州山獠舉兵反遣桂州都督張寶德討平之

十一月明州山獠舉兵反遣交州都督李道彥討平之
十二月右武侯將軍上官懷仁擊山獠于壁州大破之
虜男女萬餘口

十三年四月上官懷仁擊已壁洋集四州反獠平之虜
男女六千餘口

十二月詔曰明罰勅法聖人垂懲惡之道命將出軍王
者成定亂之德故三苗負固虞帝所以興師鬼方不恭
殷宗所以薄伐朕嗣膺景命君臨區夏弘大道於四海

推至誠於萬類憑宗社之靈藉股肱之力億兆獲乂尉
候無虞建木棘林山經靡紀之域幽都大夏王會不書
之君莫不革面內歛屈膝請吏襲冠帶於魏闕均征賦
於華壤而高昌麴文泰猶為不軌敢興異圖事上無忠
欵之節禦下逞殘忍之志往經朝謁備加恩禮溪壑難
滿曾無報效禽獸為心遽懷凶狡詔命之嚴稟承之誠
既闕王人之重祇敬之禮亦虧自隋季道消天下淪喪
衣冠之族疆場之人或寄命諸戎或見拘寇手及中州

既定皇風遠肅人懷首丘途經彼境皆被囚繫加之重
役忍苦遐外控告無所又伊吾之右波斯以東職貢不
絕高旅相繼琛賫遭其寇攘道路由其壅塞又西蕃突
厥戰爭已久朕愍其亂離志務安輯乃立啞利始可汗
兄弟庶令克復舊土文泰反道敗德幸災好禍間謀酋
豪交亂種落遂使氍裘之長亟動干戈引弓之人重罹
塗炭又焉耆之地與之臨接文泰疾其盡節輕肆凶威
城池有危亡之憂士女嬰劫掠之酷加以虐用其衆毒

被所部賞罰無章內外嗟怨繕造宮室勞役日興修營
輿輦僭侈無度法令深刻賦歛煩重舉手動足咸罹網
羅畜牧園菓悉有征稅衆力既盡人財已竭饑寒總至
憤歎盈途比屋連甍不勝苛政故老兒童思霑王澤朕
命上玄為人父母禁暴之道無隔內外納隍之慮切於
輿寢錄其舊歎仍懷愍念所以頻遣使人具申朝旨勗
以為善之規示以自新之路庶知感悟無煩師旅而昏
迷遂性荒怠不悛貫盈之釁既稔天亡之期已及况復

文武具僚戎狄君長諸傳月者相屬懷逐雀者比肩宜
順夷夏之心以申弔伐之典罰凶渠之多罪拯無辜之
倒懸今遣交河行軍大總管吏部尚書侯君集副總管
兼左屯衛大將軍薛萬均副總管左屯衛將軍薛孤吳
兒行軍總管武衛將軍牛進達等董率衆軍弘宣廟畧
乘驛進路同會虜庭莫不氣奪風雲精貫日月援枹懷
憤拔距爭先良將奮建瓴之威銳卒効貔貅之勇冀馬
燕犀猶迅雷之震擊雲梯地道若至神之變化以此制

敵事等摧枯以此屠城易於反掌然朕矜哀之心有懷
去殺勝殘之道無忘好生若文泰面縛軍門泥首請罪
特弘焚櫬之澤全其將盡之命自餘臣庶棄惡歸誠並
加撫慰令各安堵示以順逆之理布茲寬大之德如其
同惡相濟敢拒王師便盡大兵之勢以致上天之罰明
加曉諭稱朕意焉

十四年三月賓州道行軍總管黨仁弘擊羅賓反獠破
之俘七千餘口

八月交河道行軍大總管侯君集擊高昌破之初其王
文泰時過絕西域商賈太宗徵文泰入朝而稱疾不至
乃詔侯君集討之文泰聞王師將起謂其國人曰唐國
去此七千里沙磧濶二千里地無水草冬風凍寒夏秋
如焚風之所吹行人多死嘗行百人不能得至安能致
大軍乎若頓兵于吾城下二十日食必盡自然魚潰乃
接而虜之何足憂也及軍至磧口而文泰卒其子智盛
襲位君集率兵至柳谷侯騎言文泰尅日將葬國人咸

集諸將請襲之君集曰不可天子以高昌驕慢無禮使
吾恭行天罰今襲人於墟墓之間非問罪之師也於是
鼓行而前攻其地城賊嬰城自守君集諭之不行先是
大軍之發也帝召山東善為攻城器械者悉遣從軍君
集遂刊木填隍擁撞車撞其埤堦數丈湏穴拋車石擊
其城中其所當者無不糜碎或張氊被用障拋石城上
守陴者不復得立遂拔之虜其男女七千餘口仍進兵
圍其都城智盛窮蹙致書於君集曰有罪于天子者先

王也天罰所加身已喪背智盛襲位未幾不知所以僭
闕異尚書哀憐君集報曰若能悔禍宜束手軍門智盛
猶不出因命士卒填其隍塹發拋車以攻之又為十丈
高樓俯視城內有行人及飛石所中處皆唱言之人多
入室避石初文泰與西突厥欲谷設約有兵至共為表
裏及聞君集至欲谷設懼而西走千餘里智盛失援計
無所出遂開門出降君集分兵畧地遂平其國俘智盛
及其將吏刻石紀功而還

十五年十一月薛延陀盡其甲騎并發同羅僕骨迴紇
靺鞨霄等衆合二十萬卒一人馬四匹度漠屯白道川
據善陽嶺以擊思摩之部思摩引其種落走朔州留精
騎以戰延陀乘之及塞詔營州都督張儉統所部騎兵
及奚靺契丹等歷其東境兵部尚書李勣為朔州道行
軍總管率兵六萬騎千二百屯朔方右衛大將軍李大
亮為雲州道行軍總管率兵四萬騎五千屯靈武右屯
衛大將軍張士貴率兵一萬騎七千為慶州道行軍總

管出雲中涼州都督李襲譽為涼州道行軍總管以經
畧之又遣右屯衛將軍姜行本率左右飛騎及左右衛
引强者千人受李勣節度是月李勣擊延陀之衆破之
初延陀次通漢川李勣領朔州延陀子大度設領三萬
兵臨長城欲入擊突厥而思摩已南走知不可得乃遣
人登長城而罵之因見大軍塵埃連天遽退告延陀先
還而自將其衆走赤柯灤度青山道頗迂遠李勣選麾
下騎突百六十皆驍悍敢死弱弓長稍自直道度設知

不脫乃亘十里而陳兵先是延陀擊沙鉢羅及阿史那社爾皆以步戰而勝及其將來寇也先講武于國中教習步戰每五人以一人經習戰陣者使執馬而四人前戰克勝即授馬以追奔失于應接罪至於死沒其家口以賞戰人至是遂行其法突厥兵先合輒退延陀乘勝而逐之勦兵拒擊而延陀萬矢俱發傷其戰馬李勣乃令去馬步陣率長稍數百為隊齊奮以衝之其衆潰敗副總管薛萬徹率數千騎收其執馬者其衆失馬莫知

所從因大縱擊斬首三千餘級獲馬萬五千匹甲仗輜
重不可勝計會暮殺之不能盡大度設跳身而遁萬徹
將數百騎追之不及其餘衆又奔走相騰踐至漠北大
雪馬疲不前人凍死者十八九先是延陀祭天祈雪我
師不能逐及此自斃馬李勣旋軍定襄太宗遣使賫璽
書以勞將士突厥諸部有思結者先處代州五臺縣其
意嘗欲歸延陀因是而叛代州追兵適及會李勣旋軍
至首尾圍擊思結計無所出走入峨谷中自度必死前

殺其妻子然後力戰勦又敗之斬首五百級生擒一千五百人虜其男女三千餘口獲牛馬稱是

十八年七月太宗以高麗莫離支自殺其主發兵擊新羅新羅盡禮以事國家數遣使稽顙請援乃遣高麗解兵不從欲擊之於是勅將作大匠閻立德括州刺史趙元楷宋州刺史王波利往洪饒江等州造船艦四百艘可以載軍糧泛海攻戰者且遣輕騎數千至遼東城以觀其勢甲午遂下詔曰百濟高麗恃其僻遠每動甲兵

侵逼新羅日蹙百姓塗炭遣使請援道路相望朕情深
愍念爰命使者詔彼兩蕃戢兵敦好而高麗姦武攻擊
未已若不拯救豈濟倒懸宜令營州都督張儉守左宗
衛率高履行等率幽營二都督府兵馬及契丹奚靺鞨
往遼東問罪屬遼東水泛溢儉等兵不能濟

十月安西都督郭孝恪帥師滅焉耆孝恪執其王龍突

騎支送行在所

時帝幸九成宮
故曰行在所

初王師之滅高昌也制

以高昌所虜焉耆生口七百盡還之焉耆王尋叛歸於

欲可汗朝貢稀至令孝恪伺其機便孝恪因表請擊之以孝恪為安西道行軍總管率步騎三千出銀山道以伐焉耆孝恪夜襲其城破之

十一月命太子詹事英國公李勣為遼東道行軍總管出柳城禮部尚書江夏郡王道宗副之刑部尚書鄖國公張亮為平壤道行軍總管以舟師出萊州左領軍常何瀘州都督左難當副之發天下甲士召募十萬並趣平壤以伐高麗

十九年四月英國公李勣攻蓋牟城破之

時帝親征此已後至班師

事具帝王

親征門

二十年六月遣兵部尚書固安公崔敦禮特進英國公李勣擊破薛延陀於鬱督軍山北前後斬首五千餘級虜男女三十萬人時鐵勒僕骨同羅共擊延陀多彌可汗大敗之帝以延陀破亡遣江夏王道宗左衛大將軍阿史那社尒為渤海安撫大使又使右領軍衛大將軍執失思力領突厥兵代州都督薛萬徹營州都督張儉

各統所部兵分道並進又令右驍衛大將軍契苾何力領涼州及胡兵同入以為聲援江夏王道宗等兵既渡磧遇阿波達官控弦數萬直前拒戰道宗進擊破之斬首千餘級追奔二百里薛萬徹別軍北道與迴紇相遇二將各遣使諭以綏懷之旨其酋帥見使者皆頓顙歡叫曰不意大國遠見存撫俱請入朝既而諸部降書皆至百僚畢賀

二十一年三月伐高麗以左武衛大將軍牛進達為青

丘道行軍大總管右武衛大將軍李海崖為副發兵一萬餘人並樓船戰舸自萊州泛海而入又以特進太子詹事英國公李勣為遼東道行軍大總管右武衛將軍孫貳郎左屯衛大將軍鄭仁泰為副將配兵三千人其營州都督府所管兵馬盡皆隸勣于是厲涉遼東自新城道入兩軍之發也並遣慣習滄波能以少擊衆者而配隸馬先是十九年帝之伐高麗也以討逆為名及破駐蹕陳帝以御副弓箛賜莫離支雖服拜銜恩而不遣

親近來謝天子以暮秋邊外詔六軍班師莫離支以王
城獲全庶幾可以自免滋虐其主又令伺我邊隙厥貢
踈薄失藩人臣大國之禮天子扼腕含怒終欲取之中
議以為高麗城雉依山攻之不可卒下往前鑿駕親伐
廢其耕稼所陷之城並收其穀韓師旅炎旱相繼夷人
以猥衆大半斷粒若得少兵番次蹂其邊場彼瘡痍之
殘疲於奔命耕夫釋耒並皆入堡島夷之邑千里荒蕪
古人云金城湯池非粟不固若再三如此高麗必大窘

迫自然逃散誰肯為莫離支嬰城鴨綠水以北可不戰而取天子以為然故有是命

七月牛進達李海崖攻高麗石城陷之虜男女數百人師次積利城下高麗出軍萬餘人拒戰海崖等擊破之斬首二千級

九月遣宋州刺史王波利中郎將丘孝忠發江南十二州造入海大船及艍船三百五十艘將征高麗

十二月詔曰皇天理物蓄嚴厲於積陰大塊厚生騰殺

氣於秋序故霆霓震曜聲懾八紘繁霜凝肅威加萬類
朕既承茲介福超上皇王憂責在躬情兼列代昆蟲不
理尤且納隍戎羯未寧豈宜安席邊矣西土自古遊魂
昔與北場本同根蒂乘戎致闕遂爾攜離雞田戴斗是
其祭天之地雁塞干雲上應分術之野疆踰瀚海局拒
塞垣總其衝燭之鄉並為征賦之俗惟有烏孫舊境冒
罽所漏本既先拔末豈能全皮尚不存毛將安附侵軼
旅焚之壤剽掠巨雀之藩播此凶荒歷年茲久積其愆

禍崇凶貫盈凡厥醜裘不勝焦爛蠢茲板屋盡苦侵漁
膜拜錦車思拯溺以延首重譯蠻邸叫嚴闈而委命裂
裳裹足驟請天誅朕乃睠西顧深悼于懷捨此弗圖孰
祇靈命是以求衣待旦對懸亡食哀彼綴旒義增投袂
雖臨軒而獨對慮疑謀之固從乃命鼎司陰籌遠畧言
纒出于唇吻應已昭于上玄昧旦臨朝太史奏曰昨宵
甲夜纖阿蝕昴考靈臺之秘簡徵渾象之舊文月者陰
精用刑之兆也星纏胡分數終之效焉是知天道雖高

去人非遠至誠仰達應不踰時奉以恭行理當無惑今
便躬秘推轂制詔夏官禡社出車發明秋令殲斯巨猾
救彼蒼黎可遣使持節崑丘道行軍大總管左驍衛大
將軍阿史那社爾副大總管左驍衛大將軍契苾何力
金紫光祿大夫行安西都護郭孝恪司農卿清河郡公
楊弘禮行軍總管左武衛將軍李海崖等總挈鼉斬蛟
之士帥曳牛佩豕之曹莫不感義長駟誓探巢穴之志
循躬距躍將謝肉骨之恩又發鐵勒兵牧十有三部突

厥侯王十餘萬騎沸湧動沙塲之地呼吸振廣漠之風
道自金微會于葱嶺又遣吐蕃君長踰玄菟而北臨步
搖首渠絕昌海而西驚齊飛白羽周設天羅縱金懸米
之源掩河津而雷擊沫赭崦山之嶠轆日域以雷奔取
彼渠魁委于司寇拯其萌隸賜以營魂俾夫六羸泛駕
免覆車而伏阜十角摧鋒與共觝而俱獻豈非有名動
衆本為除殘以義出師貴能徵惡是以倒戈必宥事表
於前經輿觀不誅理昭於往誥其有去危投歎悔禍求

哀羸幙首豪宜錫長纓之寵韋韞種落惠以飲啄之娛
且夫察微興事者機也勞已安人者義也天與則取可
謂乘機衆欲斯從是名敷義踐機而必作戴義以行之
今此一勞永康四表折兵難再或失時宜以朕之懷速
頒天下初龜茲國既臣於西突厥安西都護郭孝恪之
伐焉耆也龜茲遣軍援助自是藩禮漸缺帝大怒故有
是詔

閏十二月阿史那社爾與郭孝恪楊弘禮率五將軍又

發鉄勒十二部兵十餘萬騎以伐龜茲社爾既破西蕃處月處密乃進師趣其北境出其不意西突厥所署焉者王棄城而遁社爾遣輕騎追擒之龜茲大震守將多棄城而走社爾進屯磧石去其都城三百里遣伊州刺史韓威率千餘騎為前鋒右驍衛將軍曹繼叔次之至多褐城與龜茲王相遇及其相那利羯獵等有衆五萬逆拒王師威乃偽遁而引之其王俟利發見威兵少悉衆而至威退行三十里與繼叔軍會合擊大破之其王

退保都城社爾進軍逼之王乃輕騎而走遂下其城令
孝恪守之遣沙州刺史蘇海政尚輦奉御薛萬備以精
騎逼之行六百里其王窘急退保于撥換城社爾等進
軍圍之擒其王及大將羯獵顛等其相那利僅以身免
潛引西突厥之衆并其國兵萬餘人來襲孝恪與子待
詔同死于陣官軍大擾倉部郎中崔義起與曹繼叔韓
威等擊之那利匹馬而遁尋為龜茲人所執以詣軍前
後破其大城五所虜男女數萬口社爾因立其王之弟

葉護為王勒石紀功而旋俘其王阿黎布失畢及那利
羯獵顛等獻於廟是月以崑丘道行軍總管左武衛將
軍阿史那賀魯為泥伏沙鉢羅葉護并給鼓纛遣招討
巴西突厥

二十二年正月詔授右武衛大將軍薛萬徹為青丘道
行軍大總管右衛將軍裴行大為副率兵三萬餘人并

樓船戰艦自萊州泛海以擊高麗

萬徹入鴨綠水俘獲甚衆

四月烏

胡鎮將石神感率兵浮海直指高麗領步騎五千拒戰

於易山短兵纒接其衆大潰斬首虜八百餘人其夜賊兵萬餘襲神感之船神感設伏以待之賊不覺奮擊大破之而還

是月右武侯將軍梁建方擊松外蠻破之初雋州都督劉伯英上言松外諸蠻雖暫降欵旋即背叛請出師討之西濟河天竺道可通也由是發蜀中十二州兵討之蠻帥雙舍率衆拒戰建方擊敗之殺獲千餘人羣蠻震擾投竄山谷建方分遣使者說以利害爭來欵附前後

至者七十餘部戶十萬九千三百建方署其首領蒙和為縣令各統所部莫不感悅建方乘勝遣使往西洱河其帥楊盛見使至大駭具船將遁使者曉諭禍福示以威信咸遂稽顙請降遣守領十人來謁軍門建方振旅而退

六月薛延陀餘衆二萬人渡鮮嶸河侵瀚海金微幽陵三郡都督各發兵逆擊大破之斬獲八十級於是發燕副都護元臣率九姓鐵勒捕

是月青丘道軍師薛萬徹渡海入鴨淥水百餘里至泊
灼城南四十里止營高麗懼並棄邑居而遁泊灼城
主所失孫率步騎萬餘人來拒官軍萬徹遣右衛將軍
裴行方領步卒折衝尉羅文合為援軍繼進萬徹及諸
軍乘之賊大潰追奔百餘里及於陣所失孫進兵圍之
泊灼城因山設險阻鴨淥水以為固攻之未拔高麗遣
將高文率馬骨安地諸城兵三萬餘人來援分置兩陣
萬徹分軍以當之鋒刃纔接而賊潰俘獲且盡而還

八月辛丑遣左領軍大將軍執失思力往金山道討薛延陀餘部落

是月崑丘道將軍阿史那社爾擊處羅破之餘衆悉降
九月遣茂州都督張士貴右衛將軍梁建方發隴右及
峽中兵馬二萬餘人擊編獠初帝遣劍南造船獠獠之
人咸令減役雅印眉三州編獠或不祇承呼召相率而
反乃遣建方等討之

册府元龜卷九百八十五

欽定四庫全書

冊府元龜卷九百八十六

宋 王欽若等 撰

外臣部

征討第五

唐高宗永徽元年六月左翊衛郎將高侃率兵討突厥車鼻可汗於阿息出車鼻聞王師至携其愛妾從數百騎而遁高侃追至金山擒之以歸京師九月獻于社廟又獻於昭陵帝使謂之曰昔頡利亂亡爾不佐輔則無

骨月之情矣。延陀稱兵自立，破敗之後，爾又潛于土窟，斯即為臣不忠矣。國家遣使招撫，因爾擅行劫殺，爾之所犯不忠不義，罪不容誅。朕好生惡殺，不忍即從典刑。且先皇平殄諸國，所獲酋渠，咸恕性命，仰遵先旨。宥汝不死，乃遣釋之。拜左武衛將軍，賜宅于長安，處其餘衆於鬱督軍山，置狼山都督府以統之。

二年八月，朗州白水蠻反叛，寇麻州之界。江鎮遣左領軍趙孝祖為朗州道總管，與朗州都督任懷玉率兵討

之

十一月趙孝祖討白水蠻至羅仵候山蠻帥禿磨蒲大
鬼主都于等率諸部萬餘人守菁口以拒官軍孝祖與
戰大破之追至同進水賊帥儉彌于及鬼主董朴等精
兵六千據水為寨依山結陣遣輕騎數百來迎官軍孝
祖率兵擊之儉彌于苦戰自辰至酉賊衆大敗臨陣斬
彌于禿磨蒲及大鬼之首領十餘人賊又阻大雪飢凍
死者畧盡孝祖又奏言貞觀中討昆州烏蠻始開青蛤

弄棟為州縣弄棟之西有小勃弄二州嘗扇動弄棟欲令反叛其勃弄以西與黃瓜葉榆西洱河相接人衆殷實多於蜀州無大酋長好結讎怨今因破白水之兵請隨便西討撫而安之詔許之

三年正月弓月道行軍總管梁建方契苾何力等大破處月朱耶孤注於牢山初咄陸及阿史船賀魯之叛也招誘處月處密等部相率皆叛及建方軍至咄陸大懼遠迹西遁朱邪孤注既殺果毅單道惠乃據守中牢山

其山險絕建方分兵數道並進鼓而登四面攻之賊衆大潰孤注攜所親夜遁建方使副總管高德逸輕騎追之行五百餘里孤注據險拒戰於陣生擒斬之斬首九千級虜渠帥六十餘人

四月朗州道行軍總管趙孝祖大破白水蠻大勃律西南夷遂定之

六年正月雋州道行軍總管曹繼叔破胡叢顯養東魯等蠻於斜山克一十餘城斬首七百餘級獲馬四百餘

匹犛牛一萬五千頭

二月遣營州都督程名振左衛中郎將蘇定方等發兵一萬討高麗以侵掠新羅故也時新羅王金春秋表言高麗與百濟靺鞨相連侵其北境已奪三十三城乞兵救援故遣名振等經畧之

五月程名振率兵渡遼水至高麗以名振兵少乃開六城門出兵渡貴端水與名振合戰賊徒大敗奔走過水欲入城不得殺獲千餘人名振縱兵焚其羅郭及村落

而還

五月遣左屯衛大將軍程知節為葱山道行軍總管率左武衛將軍舍利叱右武衛將軍王文度伊州都督蘇海政等討西突厥阿史那賀魯

顯定元年八月程知節與賀魯所部歌邏祿及處月戰於榆莫谷大破之斬首千餘級獲駝馬牛羊萬計副將罔智度攻其突騎處木昆等於咽城拔之斬首三千級虜獲甚衆

九月程知節與賀魯男啞運戰斬首數千級進至嘗篤城俘其部落戶口及貨物鉅積

二年閏正月賀魯入寇詔右屯衛將軍蘇定方為伊麗道行軍總管率燕然都護任那相副都護蕭嗣業等發迴紇兵以追討賀魯仍詔右衛大將軍阿史那彌射左屯衛大將軍阿史那步真為流步安撫大使以招輯其舊衆

十二月蘇定方大破賀魯金牙山盡收其所據之地西

域悉平初賀魯侵併西域諸國進寇延州迴紇婆閏等諸部屬請討之帝前後遣梁建方契苾何力程知節等率兵追討皆不克而還及蘇定方為大總管領迴紇等兵與阿史那彌射步真等分出西州金城兩道以經畧之定方至金山之地其侯斤嬾獨祿等率萬餘帳來降定方發其千騎進至曳咥河之西賀魯率十姓兵馬且十萬來拒戰定方領迴紇及漢兵萬餘人迎擊賊輕定方兵少四面圍之定方令步卒據其原攢稍外向自領

漢騎陳于北原賊先擊步軍三衝不動定方乘勢擊之賊遂大潰追奔三十里斬獲數萬人明日總兵復進賀魯之衆五努失畢部落相次來降五努失部落聞賀魯敗各向南道降于步真所至蕃人皆相率歸降曰我舊主也定方乃令副將蕭嗣業回紇婆閨率蕃兵趨邪羅斯川以追賀魯定方與任雅相領新附之衆以繼其後會大雪平地二尺軍中咸請停兵候晴定方曰虜恃雪深謂我不能前進必當憇息追之可及緩以縱之則漸

遠難追省日兼功在此舉也於是勒兵衝雪晝夜兼進
所經收其人衆遂至雙河與彌射步真相會兩軍合勢
去賀魯所居二里布陣長驅徑至金牙山所時賀魯集
諸衆欲獵定方與彌射縱兵擊之盡破其牙帳生擒數
萬人并獲其鼓燾器械賀魯遂與吐運及其女夫閭噉
等脫走投石國定方于是悉兵命諸部歸其所居開通
道路列置館驛埋瘞骸骨所在問疾苦分其疆界復其
產業賀魯所虜掠者悉括還之于是西域諸國安堵如

故

三年六月營州都督兼東夷都護程名振右領軍郎將薛仁貴率兵攻高麗之衆烽鎮即拔之斬首四百餘級生擒首領以下百餘人俄而高麗遣其大將立方婁率衆三萬人來拒官軍名振率契丹兵逆擊大破之遂北二十餘里斬首二千五百級

五年三月以左武衛大將軍蘇定方為神丘道行軍大總管率左驍衛將軍劉伯英右武衛將軍馮士翹左驍

衛將軍龐孝泰等并發新羅之衆以討百濟百濟恃高麗之援屢侵新羅故也

五月以定襄都督阿史德樞賓左武侯將軍延陀梯真居延州都督李合浦並為冷硯道行軍總管各領本蕃兵以討叛奚仍令尚書左丞崔餘慶充使總護三蕃尋而奚遣使降附改樞賓等為沙磧道行軍總管以討契丹松漠都督阿卜固送之東都并擒叛奚謀主匹帝禿帝斬之而還

八月蘇定方拔百濟之真都城初定方率衆自成山濟海賊徒據熊津江口以拒官軍定方既濟乘山而陣與之大戰揚帆蓋海相續而至賊師敗績死者數千人自餘大潰遇潮直上官軍連舳入江水陸齊進飛檝鼓譟直趣真都去城二十餘里賊傾國來拒大戰破之殺虜萬餘人追奔入郭其王義慈及太子隆奔于北境定方進圍其城義慈次子泰自立為王率衆還固守義慈嫡孫文思曰王與太子雖並出城而身見在叔總兵馬專

擅為王假令漢退我父子當不全矣遂率其左右投城而下百姓從之泰不能止定方令兵士登城立幟於是泰開門頓顙請命其大將禰植又將義慈來降太子隆并與諸城主皆同送款百濟悉平

是月左衛大將軍鄭仁泰率兵討思結援也固僕骨同羅四部落三戰皆捷追奔百里斬其首領而還

十二月以左驍衛大將軍契苾何力為沮江道行軍大總管左武衛大將軍蘇定方為遼東道行軍大總管左

驍衛將軍劉伯英為平壤道行軍大總管分道發兵以討高麗

龍朔元年正月以鴻臚卿蕭嗣業為扶餘道行軍總管率迴紇等蕃兵赴平壤以討高麗

三月帶方州刺史劉仁軌大破百濟餘衆於熊津之北
四月詔兼兵部尚書任雅相為涇江道行軍總管左衛
大將軍契苾何力為遼東道行軍總管左武衛大將軍
蘇定方為平壤道行軍總管并率諸蕃軍將總三十五

軍川陸分途先觀高麗之釁帝將親率六軍以繼之

八月蘇定方破高麗之衆於泚江頻戰皆捷奪其馬邑

山因山為營遂為平壤城

明年三月
勒兵而還

十月以鐵勒殺勅使反叛詔左武衛大將軍鄭仁泰為
鐵勒道行軍大總管燕然都護劉審禮左武衛將軍薛
仁貴為副鴻臚卿蕭嗣業為山萼道行軍總管左屯衛
將軍孫仁師為副率兵以討之

二年三月鄭仁泰薛仁貴等破鐵勒之衆於天山時鐵

勒有思結多臘葛等部落先保天山及仁泰等將至亦
送降欵仁泰等結兵擊之虜其家口以賞軍士賊乃相
率遠遁

七月熊津都督劉仁願帶方州刺史劉仁軌等率留鎮
之兵及新羅之兵大破百濟餘賊於熊津之東拔其真
峴城斬首八百級

三年正月鄭仁泰等討鐵勒餘種悉平之

乾封元年六月詔左驍衛大將軍契苾何力為遼東道

安撫使以應接高麗王初高麗莫離支蓋蘇文死其長子男生代父為莫離支之位既初知國政出巡諸城使其二弟男建男產留後知國事男生既出或謂男建等曰男生惡二弟逼已意欲除之不如先以為計也男建等初不言之又有人謂男生曰二弟恐兄思奪已權欲拒兄不納男生使所親潛往平壤以伺焉男建等知而掩得之繇是遁相猜貳男建等乃以其王命召男生男生懼不敢歸男建等遂發兵討之男生走據國內城以

自守其子獻誠詣闕求救於是詔何力率兵赴援乃授
獻誠右武衛大將軍使為鄉導又遣左金吾衛將軍龐
同善營州都督高侃等為行軍總管以經畧高麗

九月龐同善大破高麗男生率所親會同善之軍

十二月命司空英國公李勣為遼東道行軍大總管兼
為遼東安撫大使左金吾衛將軍龐同善左驍衛大將
軍契苾何力並依舊為遼東道安撫大使其水陸諸軍
總管并糧運使竇義積獨孤卿雲郭待封及募兵以上

並受勳處分以討高麗河北道諸州租稅總起遼東以給軍用於是水陸分道以赴平壤

二年九月李勳拔高麗之新城遣副將契苾何力守之勳遂引兵進破一十六城

三年二月李勳及薛仁貴進拔高麗之扶餘城時偏將龐同善高侃等為後殿尚在新羅高麗男建遣救新城夜襲同善仁貴率援軍以破之侃等移軍進至金山為賊所敗高麗乘勝而進仁貴等橫擊之賊大敗斬首五

萬餘級遂拔其南蘇木底蒼崑等三城與男生之軍相會仁貴乘勝領二千人將攻餘城諸將以兵少止之仁貴曰在善用耳不在多也遂先鋒而行敗衆來拒逆擊大破之殺獲萬餘人餘城既降扶餘州內四十餘城一時送款

總章元年九月李勣進軍拔高麗之平壤城遼東悉平初勣既破大行城諸軍盡會契苾何力拔南蘇等八城會勣於鴨綠柵合軍以攻辱夷城又拔之何力引蕃漢

兵五十萬人逼平壤勅軍繼至高藏遣男產帥首領九
十八人持白幡詣勅乞降請便入朝謝罪勅以禮接之
男建猶閉門固守勅乃移兵於平壤之側以逼之男建
頗遣兵出戰皆大敗男建下主兵總管僧信誠密遣人
詣軍許開城門為內應經五日信誠果開城門勅縱兵
入登城鼓譟燒城門樓四面火起男建窘急自刺不死
遂虜高藏男建男產等以歸京師

咸亨元年四月吐蕃陷白州等一十八州詔右威衛大

將軍薛仁貴為邏婆道行軍大總管右衛員外大將軍
阿史那道真左衛將軍郭待封為副以討吐蕃將援吐
谷渾還其故地

三年正月發梁益等一十八州兵募五千三百人遣大
子右衛副率梁積壽為姚州道行軍總管率兵以討叛
蠻

四年閏五月燕山道總管李謹行破高麗叛黨於歙盧
河之西高麗平壤餘衆遁入新羅

五年二月遣太子左庶子同中書門下三品劉仁軌為
雞林道大總管衛尉卿李弼右領軍大將軍李謹行為
副發兵以討新羅時新羅王金法敏既納高麗叛亡之
衆又封百濟故地漸使人守之帝大怒下詔削奪法敏
官爵仍以其弟右驍衛員外大將軍臨海郡公金仁問
為新羅王時仁問在京師詔令歸國以代其兄仁問行
至中路聞新羅降仁問乃還

上元二年二月劉仁軌大破新羅之衆於七重城又以

靺鞨兵浮海而南畧新羅之南境斬獲甚衆仁軌勒兵而還詔以李謹行為安東鎮撫大使屯兵於新羅之買肖城以經畧之前後三戰新羅皆敗新羅於是遣使入朝伏罪并獻方物前後相屬帝竟許之復其王金法敏官爵

三年閏三月吐蕃入寇鄯廓河芳等州詔維州牧周王顯為洮州道行軍元帥領工部尚書劉審禮等十二總管并州大都督相王輪為涼州道行軍元帥領左衛大

將軍契苾何力鴻臚卿蕭嗣業等以討吐蕃二王竟不行

調露元年十月單于大都護府突厥阿史德溫傳及奉職二部相率反叛立阿史那泥熟匄為可汗二十四州首領並叛遣單于大都護府長史蕭嗣業將軍花大智

李景嘉等討之

嗣業等為賊所敗令右金吾將軍曹懷舜率兵往恒州守井陘右武衛將軍崔

獻往絳州龍門

以防禦突厥

十一月詔禮部尚書檢校右衛大將軍裴行簡為定襄

道行軍大總管率太僕少卿李思文營州都督周道務等部兵十八萬并西軍程務挺東軍李文暉等總三十餘萬以討突厥

二年三月裴行儉大破突厥於黑山擒其首領奉職偽可汗泥熟匄為部下所殺傳首來降

永隆二年正月突厥寇源慶等州令右衛將軍李知十左威衛將軍王杲分往涇慶二州統兵以防禦又遣禮部尚書裴行儉為定襄道大總管右威衛將軍曹懷舜

幽州都督李文暕等為副率兵以討突厥溫傳部落
閏七月裴行儉大破突厥史伏念之衆伏念為程務挺
急追遂執溫傳來降行儉於是盡平突厥餘黨執伏念
溫傳振旅凱旋

永淳元年四月以裴行儉為金牙道行軍大總管與將
軍閻懷且等三總管兵分道討十姓突厥阿史那車薄

行儉未卒安西副都護王方翼破車薄咽楚西域平

二年十一月命右武衛將軍程務挺為單于道安撫大

使以招討總管材山賊元珍骨篤祿賀各軍等

則天垂拱元年二月阿史德元珍等寇朔代等州命左
玉鈐衛中郎將淳于處平討擊之

十一月命天官尚書韋待價為燕然行軍大總管以討
吐蕃

三年二月突厥骨咄祿及元珍寇昌平殺掠人吏命左
鷹揚衛大將軍黑齒嘗之率諸軍討擊之

永昌元年五月命文昌左相韋待價為安息道行軍大

總管以擊吐蕃

天授二年五月命文昌右相岑長倩為武威道行軍大總管討擊吐蕃

延載元年十月命容州都督張玄遇為桂永等州經畧大使討嶺南反獠

證聖元年七月命夏州尚書王孝傑為蕭邊道行軍大總管以討吐蕃

萬歲通天元年五月營州城傍契丹首領松漠都督李

盡忠與誠州刺史孫萬榮殺都督趙文翹舉兵反攻陷
營州命左鷹揚衛將軍曹仁師右金吾衛大將軍張玄
遇左武衛大將軍李多祚司農少卿麻仁節等二十八
將討之

七月命春官尚書梁王三思為榆關道安撫大使納言
姚璿為副以備契丹制契丹首領李盡忠名盡滅孫萬
榮名為萬斬

八月張玄遇曹仁師麻仁節等與契丹萬斬戰于四硤

谷口官軍敗績玄遇仁節並為賊所虜又令夏官尚書
王孝傑右羽林將軍蘇宏暉領兵七萬以繼之孝傑在
陣陷沒宏暉棄甲宵遁萬斬乘勝率其衆入幽州屠城
剽邑殺掠人吏清邊道大總管建安郡王武攸宜遣裨
將討之不能尅萬斬俄又引兵南與官軍戰東兵遁總
管揚玄基率輕騎角其前奚人出兵以掎其後表裏合
擊之萬斬大敗獲其別帥何阿小及軍資器械不可勝
數萬斬僅以身免又收合餘兵與奚戰奚兵四面攻之

金史卷一百八十六
大潰萬斬棄其衆以輕騎數千人東走張九節率數百
騎分為三隊設伏邀之萬斬窮蹙乃將家奴輕騎宵遁
至潞河東困甚憇於林下解鞍其奴因斬之張九節傳
其首于東都懸之四方館門

三年五月命左金吾大將軍河內王懿宗為神兵道總
管右肅政御史大夫婁師德為清邊道副大總管右武
威衛將軍沙吒忠義為清邊中道前軍總管率兵二十
萬討契丹俄而李盡滅死

聖歷元年八月突厥默啜率衆襲靜難及平狄清夷等
軍靜難軍使將軍慕容玄翦以兵五千人降之賊軍繇
是大振俄又進寇媯檀等州命司屬卿高平王重規為
天兵中道大總管右武威衛將軍沙吒忠義為天兵西
道前軍總管幽州都督張仁亶為天兵東道總管率兵
三十萬以討默啜又令左羽林衛大將軍閻敬容為天
兵西道後軍總管統兵一十五萬以為後

久視元年閏七月冬令左肅政御史大夫魏元忠充隴

右令諸軍州大使以討突厥

九月左金吾將軍田揚名左臺殿中侍御史封思業斬吐蕃阿悉吉薄露傳首神都初薄露將叛也令揚名率兵討之軍至碎葉城薄露夜伏兵於城傍掠官駝馬而去思業率輕騎追擊之翻為所敗俄而揚名與阿史那斛瑟羅忠節率衆大至薄露據城拒守揚名拔之積十餘日薄露詐請降思業誘而斬焉遂虜其部落

中宗神龍二年十二月突厥默啜寇靈州鳴沙縣進寇

原會等州購募能斬獲默啜者封國王授諸衛大將軍
賞物二萬段

三年五月以左屯衛大將軍兼檢校維州長史張仁亶
為朔方道大總管以備突厥

六月姚雋道討擊使侍御史唐九徵擊姚州叛蠻破之
俘虜三千計遂紀功焉

玄宗開元二年二月突厥默啜遣其子同俄特勒率眾
寇北庭都護府右驍衛將軍郭虔瓘擊敗之斬同俄於

城下

七月吐蕃寇臨洮軍又進寇蘭州渭州掠羣牧遣左羽林將軍隴右防禦使薛訥率副將杜賓客郭知運王駿安思順禦之

十月薛訥破吐蕃於渭州西界武階驛斬首一萬七千級獲馬七萬七千匹羊牛四萬頭

三年十月詔曰越蕩之地鬻羌犯邊孤我大恩敢為小寇雖螳螂舉斧自開屠滅之辰而蜂蠆有毒仍藉討除

之勢右騎衛將軍員外置同正員李玄通負衛霍之才
蘊孫吳之法決勝千里成誦在心通知四夷若指諸掌
故能聞敵思勇好謀而成宜於戎瀘夔巴梁鳳等州羗
兵三萬人馬二千匹并舊屯兵士赴州討擊賊縱退散
亦須窮其巢穴杜絕飛走使無遺類在此舉焉

六年二月大舉蕃漢兵北伐突厥下制曰書稱四征不
庭綏厥兆民可以覆昏亂執有罪保大定功利物懲慝
故高陽有九黎之伐大舜有三苗之征欽若聖謀是為

殷鑒突厥殺

殺名也

窮漢餘裔大邦逋誅恃其悍俗未遵

朝化比為潛遁幽茫隔闕華壤固聲朔之不被將羈縻

以畜之而擾我諸蕃窺我邊境今羣方輯睦重譯會同

奉琛執贄者萬數請吏來王者億計咸以為衆之所加

各自統領師徒取其仇怨拔悉蜜右驍衛大將軍金山

道總管處木昆執朱啜堅昆都督右武衛大將軍骨薦

祿毗伽可汗等弧矢之利所向無前契丹都督左金吾

衛大將軍靜折軍經畧大使松漠郡王李失活奚都督

右金吾衛大將軍保塞軍經畧大使饒樂郡王李大酺
等士馬之精何往不克竝總我雲萃賈勇風馳西從沙
磧至于德建山下東發海浦期乎獨活何上九姓拔曳
固都督稽維郡王左武德大將軍頡質畧同羅都督右
監門衛大將軍毗伽末啜雲都督右驍衛將軍比言僕
固都督左驍衛將軍曳勒哥等種分業異效節輸忠梟
彼兇魁掃除遺孽竝左犄右角連營合圍故路絕飛走
計窮躍噬然我國家以止戈存義釁鼓傷仁方欲先德

後刑有征無戰庶番之請抑而莫從皇天有命將不獲
已突厥殺若迷而知復困即能通革面虜庭委身魏闕
解其縛焚其櫬有逢伯之前聞大者王小者侯即田橫
之故事況默啜之子右金吾衛大將軍右賢王墨特勒
逾輪自拔于亂頃投于國今不計其先人之借復加以
右賢之寵右威衛將軍左賢王阿史那毗伽特勒左武
衛大將軍燕山郡王大拔石失畢左領軍衛大將軍阿
婆啜阿史那福多右驍衛大將軍賀魯室合真阿婆囑

等或彼貴種應繫人思或彼信臣已歸邦化咸從衆望
竝錫尊官隨師以籌謀採狄之情狀便立衙帳令居塞
垣其首領百姓等有能轉禍為福去逆效順爵賞之科
國朝有典且發單于之使諭其觸網之徒優而柔之五
申三令儻覆巢未悟沸鼎猶安習苦為甘聞言不信則
戈矛所接玉石同焚勉思良圖罔替成命朔方道行軍
大總管銀青光祿大夫右散騎常侍攝御史大夫王峻
長才多竒大勇不闕寄用扞城隱若敵國當出閫之寄

有辭第之公故可總是中軍以弘上畧凡蕃漢三十萬
衆並取賧節度大戴禮云王者之征猶時雨也至則人
悅之矣俾夫武威外炤仁德內洽用恢天聲以靜邊徼
布告遐邇咸使聞知

八年九月遣左驍衛郎將攝郎中張越使于靺鞨以奚
及契丹背恩義討之也

九年四月蘭池州叛胡顯首偽稱葉護康待賓安慕容
為多覽殺大將軍何黑奴偽將軍石神奴康鐵頭等據

長泉縣攻陷六胡州命兵部尚書王峻發隴右諸軍及河東九姓掩討之殺三萬五千騎擒康待賓送至京師腰斬之

五月既誅康待賓下詔曰蘭池胡久從編附皆是淳柔百姓乃同華夏四人康待賓等敢亂天常俱為禍首驅率羣衆嘯聚沙泉使良善失業而克渠逞志人祇發怒魁首者並自誅夷鋒及揮芒陣敵者亦聞梟戮元惡既盡餘黨無多本是脅從初非爾罪今乃潛竄湏示其誠

朕亭育蒼生皆同赤子每一物之失所寧寸心之得安
莫不念切在予情深責已故先之以德亦寬之以恩乃
遣常侍趙元通又命御史大夫韋抗拊以招慰俱不稟
承儻滋蔓繁多恐邊屯塗炭非願勒於兵馬蓋須申於
帛伐朔方軍大總管王峻隴右節度使郭知運等虔奉
廟謨恭行天討所有殺戮爰及俘囚或因戰敵相交灼
然好惡無辨驚波繇是共溺烈火所以俱焚自孽誰尤
欲逃何去已滅亡者其如咎譴未歸附者是可哀憐或

反側懷憂或嫌疑多懼宜開自新之命以矜莫大之罪
其胡賊及勾引諸蕃同叛逃在山谷沙藪間疑懼不出
者並原其罪宜令夏州都督陽欽明依前處分安慰仍
以左監門將軍安慶為副依理宣慰量加招輯各令復
業務使安存訖奏聞若不順從猶持向背須別處分亦
具奏來壬申蘭池州叛胡顯首偽稱葉護康待賓偽稱
葉護安慕容以叛勅曰朕臨御寰極思養黎元一物不
安則推溝軫慮萬方未乂則分閫興憂近者蘭池叛胡

無端構孽蠢爾克醜敢忘恩化再令招諭仍未歸正理
絕矜容事資撲滅既從斯而背德不獲已而用兵朕今
發隴右諸軍馬騎掩其南徼河東九姓馬騎襲其北三
城士卒截其後六郡驍雄擊其前四面齊驅萬全直進
飛走無路糜爛待斃其蕃漢軍將以下戰士以上若生
擒及斬獲康待賓等一人白身授五品先是五品以上
授三品如臨陣先鋒能破北胡部落所獲資財口馬牛
羊並便入立功人等一切不湏官收仍別加官賞其叛

人內有能自殺獲送者應酬官賞亂常之罪一切並原
正是忠臣憤激之時壯士立功之日恭行天罰允叶人
謀摧枯拉朽匪朝伊夕布告軍州咸知朕意

十四年二月邕府獠首領梁大海周光等據賓橫等州
反遣驃騎大將軍兼內侍楊思勗討之

十五年正月涼州都督王君奭大破吐蕃於青海之西
虜其輜重及羊馬而還

十六年正月秦隴等州獠首領瀧澄州刺史陳行範廣

州首領馮仁智何遊反魯叛遣驃騎大將軍楊思勗討之

七月制曰昏迷反道天地所以致罰戎狄亂華帝王所以耀武吐蕃小醜頻年犯塞壞我城鎮虜我邊人言念征夫良深憤惋今北軍羽騎萬弩齊發山西飛將百道爭先掃蕩之期在於晷刻然賞罰必信懲勸在焉號令不明忠勇何望若迴避縱敵則寘國刑如克儻擒克瀕懸軍格其河西隴右安西劍南等州節度將士以下有

能斬獲吐蕃贊普者封異姓王斬獲大將軍者授大將軍獲次以下者節級授將軍中郎將不限白身官資一例酬賞速令布告咸使聞知

是月檢校兵部尚書蕭嵩鄯州都督張志亮攻拔吐蕃城斬獲數千級收其貨畜而還

八月蕭嵩遣右金吾將軍杜賓客擊吐蕃戰于祁連城大破之獲其大將一人斬首五千餘級

十七年二月雋州都督張審素攻破蠻拔昆明城及鹽

城殺獲萬人

三月瓜州刺史墨離軍使張守珪沙州刺史賈思順領
伊沙等州兵入吐蕃大同軍大破吐蕃駭翦不可勝紀
是月禮部尚書信安郡王禕帥衆攻拔吐蕃石堡城

十八年五月契丹衙官突可汗殺其主李召固率部落
降于突厥奚部落亦隨而叛奚王李魯蘇來奔召固妻
東華公主陳氏及魯蘇妻東光公主韋氏並奔投平盧
軍制幽州長史趙含章率兵討之

二十年正月以朔方節度等副大使禮部尚書信安郡王禕為河東河北兩道行軍副大總管知節度事率兵討契丹率戶部侍郎裴耀卿等諸副將分道統兵出於范陽之北大破兩蕃之衆擒其酋長餘黨竄入山谷九月渤海靺鞨寇登州殺刺史韋俊命左領軍將軍蓋福順發兵討之

二十二年十二月幽州長史張守珪發兵討奚契丹斬其王屈烈及其大臣可突於陣傳首東都餘叛奚皆散

走立其酋長李遇
折為契丹王

二十四年正月北庭都護蓋嘉運率兵擊突厥施大破

之以其二十三年十月寇北庭及安西撥換城也

二十五年二月張守珪破契丹餘衆於榛祿山殺獲甚衆

三月河北節度使崔希逸自涼州南率衆入吐蕃界二千餘里至青海西郎佐素文子觜與賊相遇大破之斬首二千餘級

三十六年三月吐蕃寇河西崔希逸擊破之鄯州都督杜希望攻拔吐蕃新羅城戎軍

二十八年三月權判益州長史章仇兼瓊大破吐蕃安戎城分兵鎮守之

天寶三載八月拔悉密國伐突厥烏蘇米施可汗傳首闕下

四載五月朔方節度使王忠嗣上言曰臣聞北方雜虜之中突厥為大其風俗彊悍弧矢利習而諸蠻夷皆出

其下所以憑陵河塞歷代患之太原涇陽豈惟前事山東渭上曾是近憂自陛下君臨萬邦無遠不至惟此種落尚懷二心陛下執九有安危之樞制四夷長短之運如垂霈澤則斯與草芥同風若震天威則彼惟魚肉而已故從開元二十九載部落日以攜離可敦西殺并諸侯王貴人以下前後款塞者殆至萬計其餘復相保聚更立烏蘇米施為可汗陛下又使內史尹招倩等曉以安危俾其內附鬼神所殛米施伏誅去秋又詔臣率驍

騎直至薩河內山以問其罪而左廂阿波達于等一十部並應時誅擒獨右廂之衆未平今又為九姓所破白眉特勒之首既傳於藁街骨咄祿娑訶可敦又獻於闕下霜刃未交而羣兇盡殪王師未老而大漠將空自先帝擒頡利靜北荒以來復見於今日矣伏請頒示天下宣付史館從之

八載六月隴右節度使哥舒翰攻吐蕃石堡城拔之

十載四月劍南節度使鮮于仲通將兵六萬討雲南與


其王閣羅鳳戰於瀘州

十一載三月朔方節度副使奉信王阿布思與安祿山同討契丹

十三載三月北庭都護程千里生擒叛虜阿布思獻于勤政樓下斬之于朱雀街阿布思九姓首領也開元初為默啜所破請降附及開元末北蕃大亂遂與西殺妻子及默啜之孫勃得支特勒毗伽可汗女伊然可汗小妻登利可汗女及阿布思頓利發等並率其部歸我

天寶九載秋朝于京師帝厚禮之美儀貌有材畧代為蕃酋

天寶十載范陽節度安祿山承恩阿布思不為之下祿山因請為將共討奚契丹阿布思懼祿山之害已乃率其部以叛帝詔北夷追之布思惶恐因西投葛邏祿葉護葛邏祿懼乃擒以送北庭焉



冊府元龜卷九百八十六